

Date – 11/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram hmun hrang hrangah "Kangmei Ven Hapta, 2025" hman tan a ni.
2. Rulhut hlo pek beihpui thlakna National Deworming Day (NDD), 2025 chu Mizoramah hman a ni.
3. Prime Minister Narendra Modia chuan ni thum cham turin France khawpui Paris a thleng
4. Union Jal Shakti Minister C R Patil chuan Swachh Bharat Rural hnuaiah inthiarna Ek In vaibelchhe 12 siam anih vangin naupang nuai 3 nunna chhanhim a ni a ti.

<><><>

FIRE PREVENTION WEEK

Mizoram hmun hrang hrangah "Kangmei Ven Hapta, 2025" hman tan a ni a.

Kangmei ven hapta hi nimin khan Aizawlah chuan Vanapa Hall ah Pu H.Lalengmawia, Commissioner & Secretary chuan hman puin ramkang tur ven chu mi tin mawhphurhna a nih thu leh chumi atana ngaihtuahna senpui turin kalkhawmte chu a sawm a. Ramkang chu khawvel pum harsatna a nih thu leh chumi avanga ram rang hrang pawhin kangmei venhim hna thawktute puala ni serh bik an hman thindan te a tarlang a. Nungcha leh ramngaw bakah boruakte venhim chu mitin te'n, khua leh tui tha ni tura an mawhphurhna a nih thu sawiin Mizoram chu India ram state-te zingah zia leh chhiar thiam tamna a nih angin, dan zawm kawngah entawn tlak ni tura beisei an nih thu a sawi a, Kangmei ven kawnga Department hmalakna sawiin kalkhawmte chu Kangmei ven kawnga mipui vantlang zirtirna tha lehzual a awm theihna tura ngaihtuahna senpui turin a sawm nghal a ni.

Fire Prevention Week hi District dangah pawh hman niin Champhai ah chuan Bethel Vengah Kangmei Ven Hapta 2025 hawwna inkhawm neih a ni a. Champhai Bawrh sap Pu VL Remliana chuan Kangmei Ven Hapta hi a hawng.

He huna tarlan anih danin, Mizoram sawrkar EF&CC Department-in a chhinchhiah danin kum 2024 chhung khan ram kang 3612 awmin, ram Hectare 3917.74 a zau a kang a. Heng zinga 116 chu ramngaw kang niin, hectare 94.5 a zau a kang a ni. A bak 3496 chu lo hal kaih hnawih niin, hectare 3823.24 a zau a kang a ni.

Serchhip ah chuan DC Pu Paul L Khuma, Serchhip District Fire Prevention Committee Chairman ni bawh chuan New Serchhip YMA Hall a programme buatsaihah Fire Prevention Week a hawng.

DC chuan khuarel chhiatna avangin kangmei chhuak ve bawh thin mah se in kang leh ram kang zaa 99 hi in neitute, ram kal te, huan leh lo neitute kan fimkhur tawh loh vang a ni, a ti a. Kangmei a chhuah loh nan mi tinin mawh an phur a ti.

Kalkhawm ten kangmei veng tura thutiam an chham a, Serchhip Sub Headquarters YMA President Pu Kawlthuama'n a kaihruai a ni. Thu sawina hun a hmang nghal bawh a ni.

Mamit ah chuan Chhim Veng YMA Hallah DC, Pu K Lal lawmlova, Chairman District Level Committee on Fire Prevention chuan a hmanpui a.

Pu K Lal lawmlova chuan DLCFP in a hma a lo lak tawhna te chu fakawm a tih thu sawiin tun a hman tur Fire prevention week-ah hmalak zel turah pawh duhsakna a hlan a, tlawmngai pawl te, zirlai leh vantlang mipuite te nen tang rual a theihtawp chhuah turin a chah a, Mizo tlawmngaihna hre reng a hmasawn tum a thawk turin a ngen.

Lawngtlai District ah chuan Adviser to CM Dr. Lorrain Lalpekliana Chinzah chuan hmanpuiin Ram kang chuan thing leh mau bakah ramsa leh nungchate chenna a tichereu a, leilungin a hanna hlauhin, tui hna nasa taka tikhiamin a awm thin a, a tuartu zingah mihringte pawh an tel thin a ni, a ti a. Mizorama ramkang tam zawk chu mihringte vanga chhuak a ni tih tarlangin, hei hian fimkhur a tul zia a tilang Chiang hle a ni a ti bawh.

Saitual District ah chuan DC Dr. Lalngura Tlau chuan ram changkang apiangin an ram ngaihhlut nachang an hria tih sawiin, Mizote pawhin a neitu rilru puin ram humhalhin, kangmei laka venhim a tul a ti a, kangmei chu thunun a nih chuan thil tangkai tak a nih rualin, thunun loha a awm chuan thil hlauhawm tak leh chhiatna tam tak, thihna hial pawh thlen theitu a ni tih a sawi bawh.

(PTC's)



SILENT PERIOD

State chhunga Village Council (VC) leh Local Council (LC) inthlan atana campaign hun chu nimin tlai dar 4 khan khar a ni a, silent period hman mek a ni.

State Election Commissioner Dr.H. Lalthangliana chuan inthlang turin engkim peihfel a ni tawh tih a sawi a, VC/LC inthlan vote thlak hi nilaini, ni 12 khian neih tur a ni a, vote nei zawng zawng te rilru thianghlim tak pu a vote thlak theuh turin a sawm a ni.

(Byte of State Election Commissioner)

Pu Lalthangliana chuan, MPF leh NGO hrang hrang te nen an thawhhona a that avang leh Mizoram mipuite an changkan vang bakah tulloa in beih an chin loh avangin inthlan muanawm tak neih a nih thin thu Akashvani correspondent a hrilh a. Tun LC/VC inthlan turah hian Person on Election Duty leh voter ten an roll awlsam taka an en theih nan ECI website ah dah nih dawn bakah, vote tla te a ruala chhiar tum a ni a ti a, hei hi Mizoram ah an tih vawi khatna tur a ni.

Tun tuma vote tla te hi zan dar 7 atanga chhiar tan tur a ni a. Vote thlak that ngai a awm a nih chuan ni 13, ningani ah thlak leh tur niin ni 13 vek dar 7 hnulam ah vote thlak that ngai te chu chhiar leh nghal a ni bawk ang. Thlan tharte chu ni 15, zirtawpni ah insiamrem hman tur niin, Ni 15-inrinni ah inthlan hmawr bawk a ni ang.

Autonomous District Council awmna tiam lovin, Mizorama district 9-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih laiin bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuthu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm bawk a. LMC hnuaia LC te hi an inthlan hmasakna ber tur a ni.



NATIONAL DEWORMING DAY

Naupang kum 1 atanga 19 inkar ten rulhut an pai lohna tura rulhut hlo pek beihpui leh rulhutin a nghawng thalote inzirtirna hun, National Deworming Day (NDD), 2025 chu Mizoramah hman a ni a,

CMO Aizawl East District chuan National Deworming Day February Round 2025 chu Zarkawt Anganwadi Centre ah hawnna hun an hmang a, Anganwadi naupangte rulhut hlo ei tir an ni.

He rulhut hlo pek beihpui thlak hian rulhut vanga naupang thisen tlachham leh hrisel lohna hrang hrang avanga an zirlai a harsatna thlen thei tur tihbo hi a tum a ni.

He hun hi Women and Child leh Education department staff te leh Zarkawt MHIP hruaituten an tel pui a ni.

Champhai ah chuan Bawrhsap Pu VL Remliana chuan India sawrkar kalphung chu mipuite zalenna nekcheptu ni lovin mipuite hmakhua ngai a ruahmanna siam thin tu a ni, a ti a. Sikul naupangte chu sawrkar ruahmanna te chhawr tangkai a, hmasawnna atana lo hmang zel turin a chah a ni.

Pu VL Remliana chuan hriselna a that loh chuan hlawhtlinna chan a har thin a ni tiin, zirlaite chu an taksa uluk taka vawng a, hriselna ngaipawimawh turin a chah a. He mi kawngah hian zirlaite chu mithiam te thu sawi pawm thiam a, zawm tum theuh turin a chah bawk a ni.

Khawzawl District ah chuan Govt Little Flower School ah Bawrhsap Pu K. Vanlalthiana hoa hman a ni a, Khuallian chuan naupang kum 1 atanga kum 19 inkarin rulhuthlo kim takin ei vek se a duh thu a sawi a, Khawzawl district chhunga naupang ten kim taka rulhut hlo an ei theih nan NGO hrang hrang te pawh tulna apiangah hma la turin a ngen thu a sawi bawk.

National Deworming Day (NDD), 2025 thawhkhatna hi ni 17 thleng neih tur a ni a. Hemi hun chhung hian District chhunga zirna in hrang hrangah rulhut hlo (Albendazole) a huhovin ei a ni dawn a, zirna ina inziak lut lo te chu ASHA-ten an inah kal chilhin an pe dawn a, a ei tur ten an ei veka tumah hmaih an awm loh nan a thualnawmna (Mop Up Day) hi tun thla ni 17-ah neih leh tur a ni. National Deworming Day thawhnhina hi August thlaah neih leh tur a ni ang.

(Desk)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



PM

Prime Minister Narendra Modia chuan ni thum cham turin France khawpui Paris a thleng. PM Modia hi a France Minister of the Armed Forces Sebastian Lacornu chuan airport ah a lo hmuak a. Paris khawpuia India miten hlim takin an lo lawm bawk a ni. PM chuan Paris-ah ropui taka lo lawm anih thu

social media ah a tarlang a. India miten an lo lawmnaah lawmthu sawiin an hlawhtlinnaah a chhuang hle tih a sawi a ni.

Nizan vek khan Prime Minister Modia hi French President Emmanuel Macron chuan zanriah a buatsaih sak a ni.

PM Modia hian vawiinah AI Action Summit-ah hun a hmang dawn a. President Macron nen an inkawm dawn bawk a.India-French inlaichinna chungchang an sawidun bawk ang.

Pu Modia hian Marseille khawpui a tlawh dawn bawk a. Indian Consulate hmasa ber a hawng dawn a. Hei bakah hian International Thermonuclear Experimental Reactor (ITER) project a tlawh ang a. Mazrgues War Cemetery-ah India sipai Indopui pakhatna leh pahnihnaa thite hriatrengna hmun a tlawh bawk ang.

(VC)

(Newsonair)

<><><>

AIRPORTS

Union Minister of Civil Aviation Kinjarapu Rammohan Naidu chuan sawrkarin ramchhungah airport a tam thei ang ber siam a duh a ti. Nimina Rajya Sabha-a zawhbelhna chhangin Union Minister chuan Narendra Modia Prime Minister anih hnuah Idnia dinhmun chu kum 10 kalta chhungin a danglam nasa hle a ti a. Airport pawh ramchhungah siam belh zel a ni a ti a. Udaan Scheme kalpui anih hnuah mi naran middle class leh a aia hnuaihnnung zawkte pawh thlawhna hmangin an zin ve thei tawh a ni a ti bawk.

(Newsonair)

<><><>

JAL SHAKTI

Union Jal Shakti Minister C R Patil chuan Swachh Bharat Rural hnuaiyah inthiarn Ek In vaibelchhe 12 siam anih vangin naupang nuai 3 nunna chhanhim a ni a ti. Nimina Rajya Sabha-a zawhbelhna chhangin Minister chuan Swachh Bharat Mission hnuaiya inzirtirna kalpui avangin mi vaibelchhe 7 chuangte ek in an hman phah a ni a ti bawk.

(Newsonair)

<><><>